



Broj: 01/5-50-1-6-9/07  
Sarajevo, 9.10.2007.godine

**Z A P I S N I K**  
**9. sjednice Komisije za saobraćaj i komunikacije,**  
**održane 9.10. 2007. godine**

Sjednica je održana 9.10.2007., s početkom u 12,20 sati.

Sjednici su prisustvovali članovi Komisije:

1. Branko Dokić, predsjedavajući
2. Šemsudin Mehmedović
3. Slavko Matić
4. Sadik Sado Bahtić
5. Mehmed Suljkanović
6. Savo Erić

Opravdano su odsustvovali: Snježana Rajilić, Husein Nanić i Selim Bešliagić.

Iz Vijeća ministara BiH sjednici je prisustvovao Veselin Poljašević, zamjenik ministra komunikacija i prometa BiH, a iz Javnog RTV servisa BiH Nikola Deretić, predsjedavajući Upravnog odbora.

Sjednici je prisustvovao i sekretar Komisije za saobraćaj i komunikacije Ahmed Jalovičić.

Predsjedavajući je upoznao prisutne da je, u skladu sa zaključkom 8. sjednice Komisije, danas imao sastanak s predstavnicima autoškola o Prijedlogu zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini, te smatra da ranije dostavljeni dnevni red treba dopuniti ovom tačkom i predložio sljedeći

**D N E V N I R E D**

1. Usvajanje Zapisnika 8. sjednice Komisije;
2. Razmatranje Izvještaja o radu i poslovanju Javnog radiotelevizijskog servisa Bosne i Hercegovine za 2006.godinu, sa Izvještajem o radu Upravnog odbora;
3. Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini – predlažać: Komisija za saobraćaj i komunikacije Predstavničkog doma;
4. Tekuća pitanja.

Dopunjeni dnevni red jednoglasno je usvojen.

**Ad. 1.**

Na Prijedlog zapisnika nije bilo primjedbi, pa je Komisija jednoglasno usvojila Zapisnik 8. sjednice.

## Ad. 2.

**Predsjedavajući** je dao riječ podnosiocu izvještaja.

**Nikola Deretić** istakao je da je Izvještaj Ureda za reviziju realan i korektan, te da, nažalost, upućuje na brojne probleme i nezakonite radnje. Podsjetio je da je Upravni odbor stupio na dužnost 3.10. 2007.godine, te da je potrebno obratiti posebnu pažnju na probleme s RTV taksom, marketingom i provođenjem tendera. Mišljenja je da s ovakvom marketinškom politikom sistem i emiteri ne mogu opstati, jer je marketinškim agencijama omogućen popust i do 70%. Tri emitera dogovorila su se da zajednički istupaju na tržištu, da federalna televizija radi u ime sva tri, ali se došlo u situaciju da federalna televizija ne poštuje zakon i ostavlja novac od marketinga za sebe. Ovo je problem koji ne može riješiti Upravni odbor te on očekuje pomoć i od Komisije i od Predstavničkog doma. Što se tiče RTV takse, podsjetio je da entitetski servisi prikupljaju taksu, da postoji problem nepostajanja baze podataka u BHRT-u, kao i da nemaju uvid u rad telekom operatera prilikom naplate takse. Upravni odbor upozoravao je raniji menadžment na probleme u provođenju tendera, ali su ih oni uvjerali da se na BHRT-u ne primjenjuje Zakon o javnim nabavkama, što je revizija i osporila. Mišljenja je da će od velike koristi u daljnjem radu Upravnog odbora biti Programski savjet, koji ima osam članova, i to stručnih ljudi iz raznih regija. Naglasio je da nema sredstava za veću pokrivenost TV signalom, da je predajni sistem u lošem stanju, a cjelokupna oprema radi sa 50 % kapaciteta. Istakao je da je kvalifikaciona i nacionalna struktura zaposlenih nepovoljna. Upravni odbor usvojio je zaključak kojim se zahtijeva od Poslovnog odbora BHRT-a da sačini plan mjera na otkanjanju svih propusta u dosadašnjem radu i da se za svaku preporuku revizora ponudi konkretna mjera.

**Sadik Bahtić** istakao je da će Komisija za finansije posebno raspravljati o izvršenoj reviziji, dodajući da su revizori izvještaj uradili realno i profesionalno, ali da je on ukazao na niz problema. Mišljenja je da se neopravdano kupuju programi, umjesto da se pravi što više vlastitog programa, iako se u posljednje vrijeme može konstatirati da ima pomaka u radu BHRT-a. Za RTV Federacije BiH može se reći da nije javni servis, da se snimaju privatni filmovi, angažiraju se ljudi na ugovor o djelu, iako imaju znatan broj viška zaposlenih.

**Šemsudin Mehmedović** ukazao je da je, analizirajući i dopunjeni i stari izvještaj Upravnog odbora, jasno da je stanje u Radioteleviziji BiH katastrofalno, da i sadašnji Upravni odbor snosi odgovornost za ovakvu situaciju. Mišljenja je da situacija u kojoj generalni direktor BHRT-a ne može potrošiti više od 10.000 KM bez odobrenja Upravnog odbora omogućava Upravnom odboru da se direktno miješa u uređivačku politiku, jer je poznato da za realizaciju neke emisije treba najmanje 30.000 KM. Istakao je činjenicu da znatan dio takse koji se realizira u Federaciji BiH dobiva Republika Srpska, pa je jasno da dolazi do prelijanja sredstava u korist Radiotelevizije Republike Srpske, a da istovremeno nema uopće kapitalnih investicija u RTV Federacije BiH i BHRT. Naglasio je da nisu tačni podaci o nacionalnoj strukturi zaposlenih, kao i da je neopravdano smijenjen Drago Marić, bivši generalni direktor BHRT-a. Ukazao je na problem bošnjačkih kadrova koji napuštaju televiziju, dajući primjer Amira Zukića i Almire Huseinović, kao i na činjenicu da nedostaje kvalitetnih kadrova u redakciji informativnog programa, te traži objašnjenje za to. Smatra da je smanjenje prihoda od marketinga posljedica pada gledanosti programa BHRT-a.

**Predsjedavajući** je istakao da su alarmantni podaci revizije o nepoštivanju zakona i procedura za javne nabavke, te naglasio da je prilikom donošenja Zakona o Javnom RTV servisu predlagao da Upravni odbor ima sedam članova. Smatra da se zakonska obaveza plaćanja RTV takse mora poštovati i da poslanici moraju podržavati primjenu zakona.

**Nikola Deretić** istakao je da je uloga Upravnog odbora prije svega da odlučuje o raspolaganju imovinom i finansijskom poslovanju u skladu sa zakonskim propisima, da se nisu miješali u stvaranje programa, mada sada misli da su trebali. Zakonom o javnim preduzećima propisano je da direktori imaju ovlaštenja za raspolaganje iznosom novca od maksimalno 10.000 KM. U Izvještaju je navedeno da je kvalifikaciona i nacionalna struktura zaposlenih nepovoljna, što je tačan podatak. Što se tiče primjedbe o osipanju bošnjačkog kadra, nije mu poznat taj podatak, a o razlozima i načinu smjene direktora Drage Marića već

ranije je obaviješten Predstavnički dom. Ukazao je da je, prema posljednjim istraživanjima gledanosti, BHRT najgledanija televizija u Bosni i Hercegovini.

**Slavko Matić** istakao je da se neće izjašnjavati o Izvještaju o radu i poslovanju Javnog radiotelevizijskog servisa Bosne i Hercegovine za 2006.godinu, jer Hrvati u Bosni i Hercegovini ne smatraju Radioteleviziju BiH svojom, što je opravdano s obzirom na program i nacionalnu strukturu zaposlenih, pa je shodno tome kod Hrvata najmanji stepen naplate RTV takse.

**Mehmed Suljkanović** smatra da je situacija u Radioteleviziji BiH alarmantna, te da, s obzirom na nagomilane dugove, neko mora odgovarati za dosadašnje propuste u radu. Krajnje je vrijeme da se počnu rješavati teškoće u poslovanju, te je naglasio da će glasati protiv usvajanja Izvještaja.

**Sadik Bahtić** smatra da je, s obzirom na činjenicu da je u Izvještaju Ureda za reviziju institucija BiH o reviziji BHRT-a za 2005. i 2006.godinu navedeno niz aktivnosti koje nisu u skladu s važećim zakonima, potrebno da kontrolni organi institucija Bosne i Hercegovine, prije svih inspekcija rada i finansijska policija, izvrše uvid u poslovanje BHRT-a.

**Šemsudin Mehmedović** smatra da je neophodno da se urade izmjene i dopune Zakona o Javnom RTV servisu BiH, kojim bi se omogućili bolji uslovi za rad BHRT-a. Neprihvatljivi su popusti koji se daju marketinškim agencijama, te ne vidi svrhu daljnje saradnje pod tim uslovima.

**Savo Erić** smatra da su programi na državnim televizijama nekvalitetni, da se mora raščistiti s lobističkim načinom razmišljanja. Podržava prijedlog Sadika Bahtića o potrebi da kontrolni organi izvrše uvid u poslovanje, jer je krajnje vrijeme da se preduzmu konkretne mjere s ciljem rješavanja nepravilnosti u radu BHRT-a.

**Predsjedavajući** je mišljenja da je potrebno da Upravni odbor dopuni Izvještaj, jer je očigledno da se mnoge stvari moraju razjasniti. Ne može prihvatiti tvrdnju da se pokrivenost TV signalom ne može povećati, jer u mnogim ruralnim predjelima uopće nema TV signala, a treba uzeti u obzir da bi digitalizacija u Bosni i Hercegovini trebalo da zaživi tek 2014.godine. Smatra da BHRT mora imati bazu podataka o naplati takse, da je stanje s marketingom neprihvatljivo, te da nije u redu da se daju značajni popusti marketinškim agencijama, naglašavajući da je potrebno napraviti plan mjera za unapređenje vlastite marketinške službe. Reforme se moraju provoditi i u medijima, potrebno je izvršiti racionalizaciju broja zaposlenih, te unaprijediti kvalifikacionu strukturu zaposlenih.

**Nikola Deretić** ukazao je da je neophodno riješiti teškoće u saradnji sa RTV Federacije BiH, te da bi mnogi problemi bili riješeni uspostavom korporacije i kuće prodaje.

Sa pet glasova „protiv“ i jednim „suzdržanim“, Komisija nije usvojila Izvještaj o radu i poslovanju Javnog radiotelevizijskog servisa BiH za 2006.godinu, jer ne odražava stvarno stanje BHRT-a za 2006.godinu, pa predlaže Predstavničkom domu da Izvještaj ne usvoji.

Razmatrajući Izvještaj o radu Upravnog odbora, Komisija je jednoglasno usvojila zaključak:

Potrebno je da Upravni odbor dopuni Izvještaj s više detalja o radu i aktivnostima od imenovanja do danas, te da, zajedno s Poslovnim odborom BHRT-a, preduzme mjere na otklanjanju propusta navedenih u Izvještaju Ureda za reviziju institucija BiH, kao i da sačini Plan mjera za rješavanje problema dugovanja i naplate potraživanja BHRT-a.

Komisija je, također, usvojila zaključke koje upućuje Predstavničkom domu na usvajanje:

1. Uzimajući u obzir činjenicu da je u Izvještaju Ureda za reviziju institucija BiH o reviziji BHRT-a za 2005. i 2006.godinu navedeno niz aktivnosti koje nisu u skladu s važećim zakonima, potrebno je da kontrolni organi institucija Bosne i Hercegovine izvrše uvid u poslovanje BHRT-a.
2. Da se do kraja 2007.godine usvoji nova koncepcija marketinških usluga te da se uspostavi marketinška služba BHRT-a.

**Ad. 3.**

**Predsjedavajući** je upoznao prisutne da je su predstavnici autoškola na današnjem sastanku o Prijedlogu zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini istakli potrebu da im se omogući prijelazni period od četiri godine u kojem bi oni koji imaju određeno radno iskustvo mogli osposobljavati kandidate za polaganje vozačkog ispita iz oblasti propisa o sigurnosti saobraćaja. Također su iznijeli stav da ove poslove mogu kvalitetno obavljati i lica s višom spremom, što je već slučaj u zemljama regije. Smatra da su njihovi zahtjevi opravdani, jer trenutno nema dovoljno kvalificiranih ljudi za ove poslove, te predlaže da Komisija usvoji Prijedlog zakona i uputi ga na razmatranje po hitnom postupku.

**Šemsudin Mehmedović** podržava prijedlog, jer smatra da je potrebno omogućiti obavljanje ovih poslova i licima koja imaju višu stručnu spremu pravnog ili nastavno-pedagoškog smjera.

Komisija je jednoglasno usvojila Prijedlog zakona o izmjenama i dopunama Zakona o osnovama sigurnosti saobraćaja na putevima u Bosni i Hercegovini, te zaključila da ovaj zakonski prijedlog, na osnovu člana 99., a u vezi s članom 127. Poslovnika Predstavničkog doma, uputi Predstavničkom domu na razmatranje i usvajanje po hitnom postupku.

Komisija je, opredjeljujući se da se Prijedlog zakona razmatra po članu 127. Poslovnika Predstavničkog doma, imala u vidu činjenicu da se radi o jednostavnom prijedlogu zakona.

**Ad. 4.**

Budući da nije bilo pitanja, predsjedavajući je zaključio sjednicu u 14,35 sati.

SEKRETAR KOMISIJE  
Ahmed Jalovičić

PREDSJEDAVAJUĆI KOMISIJE  
dr. Branko Dokić